

Chiara Weishaupt per Sarina Caduff

che ha giu liug la gievgia vargada a Sedrun – en preschientscha dil pli ault Svizzer Martin Candinas sco era dil co-president dall’Allianza dil Center Grischun Kevin Brunold – ha il Giuven Center Surselva elegiu Chiara Weishaupt sco successiva dalla presidenta Sarina Caduff. La suprastonza vegn cumplettada da Flavia Schaniel.

La partida giuvna activa sa mirar anavos sin in onn intensiv cun biaras experientschas, sco il rapport annual lai constatar. Tiels projects il pli gronds s’audan Culinarica Surselva sco era la petiziun davart l’introducziun dad ina cumissiun da giuventetgna Surselva. Culinarica Surselva ei stau ina campagna da sensibilisaziun che la partida giuvna ha arranschau cun success. L’intenziun era da promover la branscha da gastronomia ch’ei stada pertuccada fetg dallas mesiras en connex culla pandemia, entras motivar la populaziun da visitar dapli las ustrias ella regiun durent la denterstagium.

Gronda activitad

La petiziun concernent la cumissiun da giuventetgna regionala ei vegnida approbada dalla Regiun Surselva. Las lavurs preparativas s’avonzan momentan entras ina gruppa da lavur consistenta da differentas personalitads giuvnas dalla regiun. La finamira eis ei da lantschar la cumissiun da giuventetgna tochen la fin digl onn 2023. Sper quels dus projects pli gronds ei il center s’engaschus fermamein per la reintroducziun dil bus da notg en Surselva. Quei ei sepagau definitivamein, la «Steila Surselva» carrescha uonn puspei. La Steila Surselva ei dil reminent vegnida iniziada dils antecessurs, respectivamein dalla PCD Giuvna Surselva, avon entgins onns. Plinavon ha il center era astgau selegrar dallas elecziuns dil Cussegl grond. Il consuprastont *Fabian Collenberg* ei vegnius elegius el parlament cantunal.

Nova presidenta e suprastonta

Il Giuven Center Surselva sa mirar cun plascher egl avegnir. Muort l’elecziun da *Sarina Caduff* el co-presidi dalla partida giuvna cantunala eis ella sedecidida da surdar il presidi dalla partida giuvna regionala a novas forzas giuvnas e da s’engaschar vinavon en suprastonza. Sarina Caduff era dapi igl october 2020 presidenta. Sut sia egida ha Il Giuven Center Surselva saviu gudignar entgins commembers novs engaschai sco era realisar numerus projects. Alla radunonza generala ei sia successiva vegnida elegida: *Chiara Weishaupt* da Degen vegn a presidiar la partida il futur. La giuvna da 18 onns viseta la scola media specialisada cul focus sin sanadad a Glion e terminescha quella scolaziun quest onn. En siu temps liber eis ella savens d’entupar tier siu hobi, il sittar da sport.

Plein motivaziun

Chiara Weishaupt ei motivada d'avanzar il svilup dalla Surselva ensemen culla suprastonza engaschada: «Jeu vi formar activamein igl avegnir dalla regiun e motivar auters giuvens carschi da s'engaschar. Far nuot porta buc vinavon nus, ensemen savein nus denton contonscher ina massa e sviluppar vinavon la Surselva». Supplementarmein tier ils suprastonts en uffeci sa la partida giuvna selegrar d'ina nova commembra: Cun *Flavia Schaniel* da Sumvitg survegn la suprastonza in rinforzament ed ei aschia bein preparada per las sfidas dil futur. Sco revisur da quen ei *Dominic Giger* da Trun vegnius elegius.

In brat sin pista

Suenter la radunonza generala ha Il Giuven Center Surselva envidau la giuventetgna sursilvana ad in brat davart fatgs regiunals en in'atmosfera lucca el territori da skis da Sedrun. Biebein 25 persunas interessadas dall'entira Surselva ein suandadas l'invitaziun. Quei ha legrau la suprastonza e ha naturalmein promoviu in brat intensiv e fetg interessant. (cdm/fmr)